

四庫全書

子部

欽定四庫全書

子部

山堂肆考卷十八

詳校官中書臣孫溶

主事臣祁韻士覆勘

總校官降調編修臣倉聖脉

校對官中書臣王鍾泰

謄錄監生臣王頌修

欽定四庫全書

山堂肆考卷十八

明 彭大翼 撰

地理

山

天目

山謙之吳興記杭州於潛縣天目山極高險且長輿宣
城懷安並分山為界山下有兩湖似目故名西湖志西
湖諸山之脉皆宗天目天目西去杭州府治一百七十

里高三千九百丈周廣五百五十里蜿蜒東來凌深拔
峭舒岡布麓若翔若舞萃於錢塘而猶萃於天竺自此
而南而東則為龍井為太慈為玉岑為積慶為南屏為
龍為鳳為吳山皆謂之南山自此而北而西則為靈隱
為仙姑為履泰為寶雲為巨石皆謂之北山

地肺

潘岳關中記終南山一名中南言在天之中居都之南
故云福地記其山東接驪山太華西連太白至於隴山

去長安城八十里南入楚塞連屬東西諸山周迴數百里名曰福地辛氏三秦記山中有石室靈芝常有一道士不食五穀自言太乙之精齋戒乃得見之所居之地名曰地肺可避洪水括地志終南一名太乙一名橘山一名周南

齊雲

齊雲巖在休寧縣白嶽山西北三面皆絕壁中峰可梯而上頂濶四十畝前有巨石特起曰香爐峰又謂之凌

虛臺宋程秘書靈巖二字刻於石

朝月

順天府豐潤縣東有朝月山兩峰特起狀如偃月梧州城北有通星山

行雲行雨

陽臺山在湖廣漢陽府漢川縣南行雲行雨見雨類宋范致虛詩傷心獨立陽臺望暮雨淒涼宋玉情極目草深雲夢澤連天水濶漢陽城當年楚國山仍在千古衰

王夢不成往事悠悠魂欲斷高唐今日有虛名

報天報地

漢武帝元封元年夏封太山禪肅然注曰云云亭亭肅然嵩里社首梁父皆太山下小山也太山上為壇以祭報天之功曰封太山下除地以祭報地之功曰禪

天柱

天柱山在杭州餘杭縣西南四隅陡絕聳翠參天為道家五十七福地此山在中國者有三一在壽陽一在龍

舒此則其一也宋吳昌裔有詩柱天屹業斷鰲根卧草
蒙葦伏虎痕想見山中明月夜有人長嘯抱崑崙

雲門

紹興府城南有雲門山晉王獻之嘗居之梁天監中選
學生往雲門山從何轍受業即此又湖廣靖州有風門
山

霧猪

霧猪山在徐州蕭縣東南以下有霧猪泉故名宋人曹

國舅隱此山因蛻骨於此

雲龍

雲龍山在徐州南山形蜿蜒如龍宋時山人張天驥居
此上有石佛又名石佛山唐末朱全忠遣子友裕軍於
石佛山即此

清風

清風山在盱眙縣南以山高而風清故名一在遵化縣
南山高三百餘仞

明月

明月山在順天府遵化縣西南高百餘仞上有石穴南北相通望之若明月然陝西乾州永壽亦有此山衢州府江山縣南有景星山嚴州府分水縣有慶雲山

息風

息風山在瓊州府崖州感恩縣東山下有穴深不可測每颶風作黎人禱之則止

擎雷

攀雷山在雷州府城南為府治案山

天中

天中山在河南汝寧府城北山高尺餘上土下石以其在天之中故曰天中自古考日景測分數者莫正於此宋劉敞嘗作記以表其地

雲際

雲際山在柳州府融縣城北上有二泉

雷首

雷首山即首陽山在河東蒲坂縣又封禪書所謂薄山也
月牙

月牙巖在桂林府龍隱巖北捫蘿而上石磴數十級半
山之中形如初月故名

之罘陽主

之罘山在山東萊州府福山縣東北三面瀕海史記秦
始皇二十九年登之罘刻石紀功即此郊祀志齊有八
祠之罘為陽主漢武登之罘聞稱萬歲

萊陰月主

萊山在登州府黃縣東南封禪書齊有八祠萊山為月主一名萊陰山多仙聖所居

春秋

春秋山在廬州府舒城縣南相傳唐貞元中有二禪師脫解於此遺骨尚存其來實春秋時也遂以名山

子午

子午山在陝西慶陽府合水縣東南連耀州北抵鹽州

東接延安綿亘八百餘里相傳黃帝葬衣冠處

富春

富春山在嚴州府桐廬縣西一名嚴陵山清麗奇絕號
錦峰繡嶺乃漢嚴子陵釣處前臨大江上有東西二釣
臺光餘姚人

長秋

長秋山在四川嘉定州蒲江縣治東

寒坡

寒坡山在慶遠府河池州思恩縣南岡高風急夏月亦
寒又天台縣西北有寒石山唐寒山子所居貞觀中豐
干禪師謂閻立太守曰寒山拾得即文殊普賢後身也
閻立往見之二人笑曰豐干饒舌既而隱身入巖巖即
隨合

夏屋

夏屋山在山西太原府代州東昔趙襄子北登夏屋誘
代王使厨人操銅斗擊殺之遂有代地

熱水

陝西行都司西寧衛南五百里有山出煖水流入青海
因名熱水山

溫泉

溫泉山在雲南南甸宣撫府司東層巒疊障連亘二十
餘里林木陰森下有溫泉

方臺

荆南志華容有方臺山出雲母土人採之候雲所出處

掘取無不獲者當掘時忌有人聲不則所得粗惡

員嶠

列子曰渤海之東有大壑中有五山曰岱輿曰員嶠曰方壺曰瀛洲曰蓬萊其山高下周旋三萬里其頂平處九千里山中間相去七萬里其上臺觀皆金玉禽獸皆純縞珠玕之樹皆叢生所居之人皆仙聖之種

高蓋

高蓋山在泉州府晉江縣境唐歐陽詹母墳在其下詹

拜墳有詩云高蓋山前日影微黃昏宿鳥傍林飛墳前
滴酒空垂淚不見叮嚀道早歸四川嘉定州西有高標
山巍然高峙萬象在前

浮槎

浮槎山在廬州府城東相傳自海上浮來昔有梵僧過
而指之曰此耆闍一峰也梁武帝女為尼曾於此山建
道林寺釋用孫有詩山頂有泉宋郡守李不疑飲而甘
之以遺歐陽修修為作記

金山

鎮江金山在大江中每大風起勢若浮動初名浮玉唐
裴頭陀於此開山得金表聞賜名金山上有龍游寺尋
改從山名有泉曰中泠水品稱天下第一臺曰妙高洞
曰朝陽絕頂有亭曰留雲曰吞海汪彥章云獨立無朋
以天為際風濤朝夕赴其吞吐日月晦暝環其左右唐
張祜詩一宿金山寺微茫水國分僧歸夜船月龍出曉
堂雲樹影中流見鐘聲兩岸聞因悲在城市長日醉醺

醺宋王安石詩天末海雲橫北固烟中沙岸似西興

錫山

錫山在常州府無錫縣西唐陸羽云惠山之東峰當周秦間嘗產鉛錫漢興始乏遂以名縣昔有樵者於山下得古銘云有錫兵天下爭無錫寧天下清有錫沴天下弊無錫又天下濟自光武以後不復出又叙州府城西有朱提山出銀漢諸葛亮書云漢嘉金朱提銀採之不足自食唐韓退之詩我有雙飲醖其銀出朱提即此

山也

玉堂

玉堂山在四川潼州遂寧縣北峰巒聳秀氣象雄峙縣之主山也

銀殿

銀殿山在廣西平樂府恭城縣東北常有白雲遶其上遠視如寶殿故云廬州府巢縣有金庭山乃王子喬登仙處重慶府合州有銅梁山

玉壘

山在成都府灌縣西北湔水出焉左思賦包玉壘以為
字郭璞賦玉壘作東別之標杜甫詩曰玉壘浮雲變古
今皆謂此

鐵城

鐵城山在德安府城北其石如鐵故名

聚寶

聚寶山在金陵南聚寶門外雨花臺之側山出瑪瑙石

故名

懷玉

懷玉山在廣信府玉山縣北南唐時縣令楊文逸嘗夢
一羽衣自稱懷玉山人來謁未幾其孫億生山有法海
院宋李彌大作記

銅官

銅官山在銅陵縣之南上有泉源冬夏不竭可以浸鐵
烹銅故名一在四川邛州東南南史記卓氏之先為趙人

秦破趙卓氏夫妻推輦而行曰吾聞岷山沃野下有蹲
鴟乃求遠遷致之臨邛即山鑄錢即此漢文帝嘗以此
山賜鄧通一在浙江湖州武康縣西北相傳吳王濞采
銅於此山下有二坎號銅井登州文登縣有鐵官山漢
置鐵官冶鑄於此

金婆

金婆山乃朱邪所居之處朱邪處月之別種西突厥之
苗裔世居金婆山之陽蒲類海東其地有大磧名沙陀

因以沙陀為號朱邪為姓唐憲宗時有朱邪盡忠始見於中國其後有朱邪赤心懿宗時賜姓李名國昌克用其子也

玉馬

玉馬山在江西餘干縣南上有白石如馬故俗號白馬山唐改為玉馬

金牛

金牛山在嘉興府海鹽縣西南吳地志昔有牛糞金村

民聿伯通與弟隨之牛穴此山而入二兄弟鑿山欲入
山額同死穴中

金鳳

福山在常熟縣西北本名覆釜唐改為金鳳山後梁又
改今名

銅魚

銅魚山在廣東高州府電白縣治南

金頭

金頭山在夔州府大昌縣東北其勢高聳冬月積雪不消

石耳

石耳山在銅陵縣南雙峰峻拔亦名真人峰有石高丈餘上有巨人跡

金燈

武昌府咸寧縣有金燈山上有善暉禪師墓塔每月夜有光如燈至曉乃滅鬱林州南有金鼎山

玉笥

玉笥山一在新淦縣羣玉峰道書為第十七洞天第八福地有三十三峰六洞二十五壇十一亭臺漢武帝建壇授玉清籙天降玉笥因名焉

銀瓶

銀瓶山在無為州西北一峰特起狀如銀瓶

銅鼓

銅鼓山在鬱林州南有唐時銅鼓在焉故名又鳳翔府

寶雞縣南有石鼓山山麓舊有石如鼓相傳周宣王時
所鑿唐韓愈宋蘇軾俱有石鼓歌

采石

采石山在太平府牛渚山之北昔人有於此取石因名
唐李白嘗乘月著宮錦袍與崔宗之泛舟即此處也

保泉

泉州府北有泉山一名齊雲山巒聳秀上有石乳泉清
潔甘美州名泉郡名清源本此漢書東越王居保泉山

即其地也保者保守之以自固耳

土城

土城山在紹興府東吳越春秋越王使相者求美女於國中得之苧蘿山採薪之女曰西施鄭旦飾以羅縠教以行步習於土城三年而獻吳王一名西施山

石門

叙州府慶符縣南有石門山其林薄間多蘭一名蘭山

洞庭

洞庭山在蘇州府西洞庭湖中上有十二峰狀如十二
螺髻堯女湘君嘗遊此故一名君山山有道與吳包山
潛通道書以為第九洞天相傳山有美酒得飲者不死
又按蘇舜欽水月院記中有山七十二唯洞庭稱雄其
間民俗魯樸以橘柚為恒產每秋高霜落丹苞朱實與
長松茂樹相差間自巖壑望之若圖畫內有角里村毛
公壇

瓦屋

瓦屋山在金陵溧陽縣北形勢連亘兩崖隆起如瓦屋
李白詩朝登北湖亭望見瓦屋山天清白露下始覺秋
風還

衣錦

杭州臨安縣治南有石鏡山山之東峰有圓石徑二尺
七寸其光如鏡錢鏐幼時遊此巔其形昏冠冕如王者
狀後唐昭宗改鏐所居營為衣錦營陞為衣錦城并封
此山為衣錦山

飛布

飛布山在歙縣北一名主簿山相傳有寇亂主簿葛顯率眾寶此唐天保間改今名

撫琴

撫琴山在陝西慶陽府寧州真寧縣治南即唐玄宗夢羣仙處山畔有洞風來有聲彷彿若琴音又廣州府香山縣南有橫琴山在海中形如橫琴

照鏡

照鏡山在雲南澂江府路南州西北山前有池如鏡

磨笄

磨笄山在隆慶府保安州西北史記趙襄子姊為代王夫人襄子既殺代王迎其姊夫人曰趙已亡矣吾將何歸遂磨笄於山自殺代人憐之因以名山胡曾詩云春草綿綿帶日低山邊立馬看磨笄黃鶯也解追前事來向夫人死處啼

執笏

執笏山在成都府井研縣南一峰突出青陽氏世居其
下登科不絕

鉢池

鉢池山在淮安府西形如鉢孟相傳昔仙人王喬煉丹
於此

磬石

磬石山在邳州城西南與泗水相近山有石其聲清亮
可為磬禹貢泗濱浮磬即此山所出者鳳陽靈璧縣亦

有此山又陝西耀州城東有山出青石唐天寶中取為
磬因名磬玉山其後郊廟之樂遂廢泗濱浮磬唐白居易
易詩梨園子弟調律呂知有新聲不知古古稱浮磬出
泗濱立辨致死聲感人宮懸一聽華原石君心遂忘封
疆臣果然外寇從燕起武臣不肯封疆死始知樂與時
政通豈聽鏗鏘而已矣

爛柯

爛柯山在衢州府南道書謂此山為青霞第八洞天晉

樵者王質入山見二童子圍棋質置斧於坐觀之童子
與質一物如棗核食之不饑局終童子指示之曰汝斧
柯已爛矣質歸已及百年無復時人矣宋錢顗詩春郊
雜還擁紅旌共訪仙蹤笑傲行雲徑直從深崦入石橋
宛在半空橫巖邊瑤圃新開出洞裏芝田舊種成羽客
一枰無復見青山留得爛柯名

懸甕

懸甕山在太原縣西一名結紉山晉水所出因山腹有

巨石如甕故名

肯堂

肯堂山在江西饒州德興縣東南宋邑人余欽持節江南詔許歸侍其親乃構堂山下張商英扁曰繡綵其子瀚復新之朱子扁曰肯堂因以名山

息臺

息臺山在四川眉州城西東館鎮北太平廣記昔有管輅叟遇一道人叟偕子攜酒隨道人入息臺山共飲之

道人因取籍檢視云子壽止十八遂舉筆改之曰八十其後子年果八十

落帽

落帽見重陽李白詩九日龍山飲黃花笑逐臣醉看風落帽舞愛月留人

擣衣

郡國志靈山寺有神女於此擣衣因號擣衣山山南絕巖有方石明瑩謂玉女擣練碁

磨盤

磨盤山在寧國府太平縣西霧山之下有富溪源

簸箕

簸箕山在四川眉州丹稜縣北其山圓大形似簸箕故

名

敬亭

敬亭山在寧國府宣城縣北一曰昭亭李白詩衆鳥高
飛盡孤雲獨去閒相看兩不厭惟有敬亭山

畏壘

莊子曰老聃之役有庚桑楚者偏得老聃之道以比居
畏壘之山居三年畏壘大穰畏壘之民相與言曰庚桑
子之始來吾灑然異之今吾日計之而不足月計之而
有餘庶幾其聖人乎子胡不相與尸而祝之社而稷之
乎按役徒也

瑞石

瑞石山在杭州府治南北接吳山下有涼雲洞元薩天

錫詩天風送我登鰲峰
大山小山石玲瓏
赤霞日射紫瑤瑤
白露夜滴青芙蓉
飄飄雲氣穿石屋
石上紫風吹紫竹
挂冠何日賦歸來
煮石篝燈洞中宿

甘泉

甘泉山在揚州西北高二十餘丈周回二里上有甘泉井一在西安府涇陽縣西北上有甘泉宮漢書單于峰堠以應甘泉即此

響石

響石山在宿松縣東人履之如擊鼓然荊州記桂陽又有話石山石有聲如人語故名

鳴沙

鳴沙山在玉門關西至瓜州南十里山冬夏殷殷有聲如雷出五代晉高居誨使于闐有記

枕水

桂林志雉山在城南又名灘山又名枕水高三百餘尺周圍二里上可容五百家有洞深五百餘步地窄不可

窮上多白蝙蝠宋承初間有僧栖顓居之日誦法華經
有雉終日來聽一夕化去托生民間有來告者栖顓訪
之果然因名雉山

盤堤

盤堤山在鞏昌府階州東南近有盤堤城晉鄧艾與蜀
將姜維相持於此

獨秀

桂林志獨秀山孤標直聳約五百餘尺周回一里頂平

如蒼玉正面端嚴秀整側視如卓筆較諸峰獨雄故名
山上有巖前宋始安太守顏延之讀書其中後為報恩
寺今在靖江王府中唐張固詩孤峰不與衆山儔直入
青霄勢未休會得乾坤融結意擎天一柱在南州

同盟

同盟山在衛輝府獲嘉縣東北相傳武王伐紂與諸侯
同盟於此

大別小別

大別山在湖廣漢陽府城東北漢江之右禹貢內方至於大別即此三國南北之際常為必爭之地一名翼際山一名魯山以山有魯肅祠故名小別山在漢陽府漢川縣南山形如甌亦名甌山左傳吳與楚戰濟漢而陣自小別至於大別即此

大孤小孤

大孤山在九江府城東南彭蠡湖中與都昌分界四面洪濤屹然獨聳上有神祠過者必致祭焉小孤山在彭

澤縣北宋歐陽修曰江南有大小孤山俗轉為姑江側有彭浪磯俗轉為彭郎云彭郎者小姑壻也余嘗過小孤山其廟像乃塑一婦人而勅額亦為聖母廟豈止俚俗之謬哉又東坡詩舟中賈客莫謾狂小姑前年嫁彭郎

大峴小峴

小峴山在安豐六安縣其山出茶號小峴春以琅琊有大峴山故名小峴

大蜀小蜀

廬州府城西有大蜀山爾雅蜀者獨也此山孤立卓秀無岡阜聯屬故名宋董淳有賦山之西又有山差小名小蜀山

大劔小劔

四川保寧府劔州北有大劔山一名梁山劉儀鳳劔閣記梁山之險蜀所恃以為外戶即此其山峭壁中斷兩崖相嵌如門之闢如劔之植故又名劔山小劔山與大

劒山相屬秦惠王欲伐蜀而道不通乃作五石牛以金置尾下言牛能糞金欲以遺蜀蜀王乃令五丁力士拖牛成道秦因滅蜀大劒雖號天險徑路頗夷小劒則鑿石架閣有不容越者

大梨小梨

叙州府東有大梁山小梁山四時常雨俗呼為大漏天小漏天寰宇記謂之大梨山小梨山又太平府西南有天門山二山夾江東曰博望西曰梁山對峙如門又名

東梁山西望山李白詩天門中斷楚江開碧水東流至此迴兩岸青山相對峙孤帆一片日邊來

小帆

小帆山在瓜步山東大江中流矗起高八九丈周圍半里水落痕出常丈許山頂如白礬俗呼為礬山一名石帆上有落帆將軍廟北有出佛洞江流至此甚險舟人鮮有不乞靈者

大輪

大輪山在泉州府同安縣北羣峰環列如異人竒鬼或乘車張蓋或露冕巍哉或如帶甲或如躍馬或如奔輪

大滌

大滌山在杭州府餘杭縣西南中有日月分精金堂玉室或言此山清幽大可以洗滌塵心遂名大滌中峰之上有許邁升天壇及丹竈瓦甃尚存

大圍

大圍山在瀏陽縣東北上有白沙湖廣袤五十餘里流

分四派一為瀏水其三入岳之平江豫章之分寧袁之萬載岡巒圍統盤踞四縣因名大圍

舜耕

歷山在平陽府蒲州南即舜耕處括地志蒲州河東雷首山一名中條山一名歷山亦名首陽山亦名蒲山亦名襄山亦名甘棗山亦名猪山亦名狗頭山凡十二名隨州縣分之歷山南有舜井又云越州餘姚縣有歷山舜井二所又有姚墟云舜生處也及鵠州歷山舜井亦

云舜所耕處未詳孰是

禹會

塗山在鳳陽府懷遠縣東南與荆山相對峙淮水經其中禹會諸侯於塗山即此西南有禹墟及禹會村柳宗元有銘又司馬遷傳禹巡狩至會稽山而崩因葬焉山有孔穴民間云禹入此穴故名禹穴

堯母居

伊祁山在保定府完縣西乃堯母所居

顏氏禱

尼山在曲阜縣東南連泗水鄒縣界一名尼丘山昔叔梁紇與顏氏禱於尼山而生孔子今其麓有宣聖廟西南有觀川亭東有坤靈洞元時有人持火曳絙而入北三數丈忽隙間有光覩一室口廣兩楹許中橫石床石枕皆天成又鄒縣東北有昌平山史記謂孔子生魯昌平鄉即此

孔望

孔望山在淮安海州城東孔子問官於邾子嘗登此山以望東海常州府江陰縣西南有秦望山風土記秦始皇登此四顧因名

計籌

計籌山在武康縣東南高七十三丈圍五里三十步吳興志越大夫計然嘗計籌於此故名山有崖甚奇秀元道堅嘗居其下扁曰白雲洞天按計然索隱作計倪范蠡師也姓辛氏字子文

楚墓

楚王山在徐州城西山下有楚王墓山皆赭土禹貢厥貢惟土五色王莽時徐州歲貢土五色即此

魯臺

魯臺山在黃州府黃陂縣二程讀書處

彭城

山在徐州東北大石上鐫彭城山三大字搜神記陸終第三子曰錢鏗封於彭城為商伯今徐州東門外城即

古之彭國也

蘇門

蘇門山在河南衛輝府輝縣西北一名百門山晉孫登
隱此號蘇門先生阮籍往謁與商畧終古嘿然不應籍
退至半山聞山巔有聲若鸞鳳乃登長嘯也登字公和

偃龕

徐山在徐州城南周徐偃王作亂穆王命楚伐之偃王
敗走彭城武原山下民隨之以萬數王死民鑿石為龕

以祀因名

桓櫛

桓山在徐州城東北一名鼉山臨泗水宋桓魋作石櫛於此故名蘇軾守徐州有記并歌桓山之上維石差哉兮司馬之惡與石不磨兮桓山之下維水瀾瀾兮司馬之藏與水俱逝兮至今徐土崩多石櫛出沒於水蓋三年不成必於此太淫巧也

漢銘

東漢竇憲與單于戰於稽落山大破之遂登燕然山勒石紀功命班固作銘

唐頌

鎮南峰在廣西桂林府城北朝京門旁有石崖天齊唐大歷間刻平蠻頌宋狄青平儂智高勒碑於此

秦鑿

丹徒縣城東有京峴山秦時望氣者言其地有王氣始皇使赭衣三千徒鑿京峴山為長坑以洩其氣即此京

鎮京口皆以此山得名鑿山之徒皆赭衣故縣名丹徒

吳封

國山在宜興縣西南高百二十五仞延袤三十六里舊傳仙人鍾離墨得道於此名離墨山又山有九峰相連亦名陞山吳五鳳初山大石自立孫皓遣司徒董朝等行封禪禮改今名

越秀

越秀山在廣州府城北聳拔二十餘丈上有越王臺故

址昔趙陀因山為之唐韓愈詩樂奏武王臺是也

胡避

無為州西有胡避山宋紹興初郡人王之道保聚於上
羣寇不能破

陳倉

鳳翔府寶雞縣東南有陳倉山山有石類山雞趙高燒
山雞飛去晨鳴山頭聲聞三十里又按寶雞縣本漢陳
倉縣因秦文公獲石雞之異改今名

商洛

商洛山在西安府商縣東南亦名楚山即秦時四皓隱處

拜相

拜相山在廣西平南縣城東南一在慶遠府城北二峰如筍萃偉參天宋馮京祖塋在其下

招賢

招賢山在武康縣西北晉郭文招賢之處故名福建建

寧府崇安縣有起賢山劉子翬朱子嘗集於此

囚女

囚女山在湖州府德清縣北東漢青州刺史姚恢與海昏侯沈戎過江欲卜居柯田山恢女密報戎戎先居之
恢囚女於此因名

望夫

望夫山在太平府當塗縣西北昔人適楚不返妻登此
山望之乃化為石

抱子

抱子山在廣西灌陽縣東山勢重疊如襁負然

夾兒

宛州府澤縣北有夾兒山

東龕

東龕山在保寧府巴縣之東又有南龕山在縣南西龕山在縣西北龕山在縣北俱去縣五里

南屏

杭州府城西有南屏山峰巒聳秀怪石玲瓏峻壁橫坡
宛若屏障凌空而中峙者為慧日峰

西傾

西傾山在臨洮府城西南即禹貢西傾因桓是來是也

北固

北固山在鎮江府江中晉謝安蔡謨鎮郡皆於山上作
庫以儲軍資梁武帝幸之改為北固有寺曰甘露南麓
有石如羊曰狼石相傳云諸葛亮孔明坐其上與孫仲

謀破曹公也西北有天津泉

側立

側立山在登州府福山縣西北西向側立特出羣峰之外

端坐

端坐山在廣西太平府全茗州南形如人端坐

薦福

薦福山在江西饒州府東上有薦福寺

迎祥

迎祥山在叙州府慶符縣東宋置祥州以此山名

問政

問政山在歙縣東唐有干方外者學養氣之術其從弟
德晦刺歙州往訪之德晦為築臺於此號問政山房嘗
有人躡險攀蘿到絕壁上苔蘚昏蝕見有詩刻於石上
千尋練帶新安水萬仞花屏問政山自少雲霞居物外
不多塵土到人間凡二十韻

析澤

應天府東南有祈澤山相傳昔有法師結庵於此講法華經有龍女來聽法師因曰可為開一泉乎數日後有清泉湧於座南後人以祈禱多應故名

不見日月

巫峽即巫山在四川夔州府巫山縣東連亘七百里畧無斷處自非亭午夜分不見日月水經此峽乃杜宇所鑿以通江水又郭璞巫山賦巫山者巫咸以鴻術為帝堯醫師生為上公死為貴神封於此山因以名之

多產禽獸

陰山在外夷毘鄰國東西千餘里草木茂盛多產禽獸
漢時冒頓單于依阻其中後武帝奪其地匈奴入寇無
所隱蔽過此未嘗不哭

若耶

若耶山在紹興府城東南舊傳葛仙學道於此

不其

不其山在山東萊州府即墨縣漢鄭康成教授於此山

下有書帶草大如薤長尺餘

瑯琊

瑯琊山在滁州南晉元帝為瑯琊王避地於此因名唐大厯中李幼卿為刺史鑿石引泉賦詩而瑯琊之勝始聞宋賢出守文載金石而溪山之秘益顯一在山東青州諸城縣東南東枕大海齊景公欲遵海而南放於瑯琊即此

蟠冢

嶓冢山在陝西鞏昌府西南禹貢導漾東流為漢即此山有異草名花骨空若食之令人無子按通典嶓冢山有二一在水郡之上邽一在漢中府之金牛在水者漢水之所出在漢中者漾水之所出天水即鞏昌府漢時為天水郡按花骨空若二草名

文登

文登山在登州府文登縣秦始皇嘗集文士登此山論功德

武當

襄陽府均州南有武當山山有七十二峰三十六巖二十四洞五臺五井三泉三潭初名仙室山又名太嶽山真武奉元君遊覽至此改名太和其中一峰最高舊名天柱峰因棲止修煉後人謂非玄武不足以當此山改名武當以其山高壘峻若博山爐一名寥嶺又成都府治北有武擔山

武林

武林山在杭州府西南漢地理志注云武林山武林水所出亦曰靈隱曰靈苑曰仙居或謂本名虎林唐因避諱改虎為武

文塔

文塔山在衢州府開化縣治東一名文筆峰元魯貞詩天低雲有影日午塔無陰

買屬石首

荊州記石首縣陽岐山本屬南平界胡伯始以本縣境

無山買此山上計偕簿也按本縣指石首伯始漢胡廣
字廣乃石首人

謀達漢陰

列子曰太形王屋二山方七百里高萬里北山愚公年
且九十面山而居懲山北之塞出入之迂也聚室而謀
曰吾與汝畢力平險指通豫南達於漢陰可乎雜然相
許其妻曰以君之力曾不能損魁父之丘如太行王屋
何且焉置土石雜曰投諸渤海之尾隱土之北運於北

海之尾鄰人京城氏孀妻有遺男始齔跳往助之寒暑
易節始一反焉河曲智叟笑而指之曰甚矣汝之不慧
以殘年餘力曾不能毀山之一毛其如土石何北山愚
公長息曰汝之心固固不可徹曾不若孀妻弱子雖我
之死有子存焉子又生孫孫又生子子子孫孫無窮廣
也而山不加增何苦而不平河曲智叟亡以應操蛇之
神聞之懼其不已也告之於帝帝感其誠命夸蛾氏二
子負二山一厝朔東一厝雍南自北冀之南漢之陰無

隴斷焉按太形即太行

山堂肆考卷十八

欽定四庫全書

山堂肆考卷十九

明 彭大翼 撰

地理

泰山

泰山五嶽之東嶽也為兗州鎮在兗州奉符縣名蓬
玄太空洞天唐天文志降婁玄枵其神主於岱宗歲
星位焉

雲闕

漢光武封泰山雲氣成宮闕

天門

漢官儀及泰山記盤道屈曲而上凡五十餘盤經小天門大天門仰視天門如從穴中視天牕山頂西巖為僊人石閭東岩為介丘東南巖為日觀又東南為秦觀秦觀者望見長安吳觀者望見會稽周觀者望見齊也

報功

博物志泰山一名天孫言為天帝孫也五經通義一日

岱宗言王者受命易姓報功告成必於岱宗也東方萬物始交代之處宗長也言為羣嶽之長也

紀號

白虎通王者受命必封禪封者增高也禪者廣厚也皆刻石紀號著已之功績以自效也天以高為尊地以厚為德故增泰山之高以報天禪梁父之阯以報地

魯瞻

詩魯頌泰山巖巖魯邦所瞻

鄭祀

左隱八年鄭伯請釋泰山之祀而祀周公以泰山之祊
易許田三月鄭伯使宛來歸祊不祀泰山也

堯封

史記齊桓既霸會諸侯於葵丘而欲封禪管仲曰古者
封泰山禪梁父七十二家而夷吾所記者十有二焉昔
無懷氏伏羲氏神農炎帝封泰山禪云云黃帝封泰山
禪亭亭顓頊帝嚳堯舜封泰山禪云云禹封泰山禪會

稽湯封泰山禪云云周成王封泰山禪社首

虞望

虞書歲二月東巡狩至於岱宗柴望秩於山川注云柴燔柴以祭天也望望秩以祀山川也秩者具牲幣祝號之次第如五嶽視三公四瀆視諸侯其餘視伯子男也

秦松

泰山記秦始皇上泰山風雨暴至休於松樹下封松為五大夫按五大夫官名

漢栢

泰山南有廟種栢樹千株大者十五六圍相傳云漢武所種

探策

風俗通岱宗上有金篋玉策能知人壽修短漢武探策十八因倒讀曰八十其後果壽長八十

作丸

劉向列僊傳崔文子泰山山人好黃老術潛居山下作

黃九賣藥有疫氣者飲藥即愈

稷丘雍琴

列僊傳稷丘君者泰山下道士漢武東巡泰山乃擁琴而拜

張忠鑒金

崔鴻前秦錄處士張忠隱於泰山巖棲谷修導養之法鑒石為金

頭生白光

葛洪神僊傳泰山下有老父者失其姓名漢武東遊見
老父鉏於道間頭上生白光

手翳芝草

曹植飛龍篇晨遊泰山雲霧窈窕忽逢二童顏色鮮好
乘彼白鹿手翳芝草

三宮

茅君內傳仙家凡有三十六洞天岱宗之洞周圍三千
里名曰三宮空洞之天

五祠

漢書五嶽皆歲三祠獨泰山歲五祠

覽八極

李白遊泰山詩平明登日觀舉手開雲關精神四飛揚
如出天地間黃河從西來窈窕入遠山憑崖覽八極目
盡長空閒偶然值青童綠髮盈雲鬢笑我晚學僊蹉跎
凋朱顏躊躇忽不見浩蕩艱追攀

小衆山

杜甫望嶽詩岱宗夫如何齊魯青未了造化鍾神秀陰陽割昏曉盪胸生層雲決眇入飛鳥會當凌絕頂一覽衆山小

華山

華山五嶽之西嶽也為豫州鎮在華州華陰縣名太極總僊洞天少華山在華州東南連太華山太華山高五千仞有芙蓉明星玉女三峰蒼龍嶺黑龍潭白蓮池日月崖及僊掌石月之勝少華山其木多荆杞

其獸多野牛其陽多璆瑋鳥多赤鷩宋時此山嘗自
摧被害者甚衆今摧處亂石猶存

少陰

白虎通西方少陰用事萬物生華故曰華山華山記山
頂有池生千葉蓮花服之羽化因曰華山

太白

唐天文志鵠首實沉其神主於華山太白位焉太白山
即鬼谷子授蘇秦佐國之術處其祠廟在長安

神博

韓子曰秦昭王令工施鉤梯而上華山以松栢之心為博箭長八尺棋馬八寸勒之曰昭王常與天神博於此神開

見山巨靈擘開

重嶺

華山記華山高崑四合重嶺秀起

二岑

述征記華山有二岑高五千仞廣十里自小岑迄嶺表如削成
獵師見女

列仙傳毛女在華陰山中山客獵師世世見之體生毛
自言秦始皇宮人

度世追父

神僊傳衛叔卿常乘虛駕白鹿見漢武帝帝將臣之叔
卿不言而去帝悔求得其子度世令追其父度世登華
嶽見其父與數人博於石上勅度世令還

歸馬

周書歸馬於華山之陽放牛於桃林之野

騎龍

列僊傳呼予先者漢中關下卜師壽百餘歲臨去呼酒家
姬令急裝有僊人持二茅狗來一與子先一與酒姬因各
騎之乃龍也上華陰山常於山上大呼言子先酒母在此
玄仲到頂

華山記王玄仲欲登蓮花峯約寺僧云到峯頂當起煙

為信翌日持火而登僧候之果有烟起留二旬乃下僧問之云峯頂有池菡萏盛開其中又有破鐵舟存焉

文公遊巔

李肇國史補韓文公遊華嶽之巔顧視其險絕恐慄度不可下乃發狂慟哭欲縋遺書以為訣沈顏謂文公假事諷時寓意於此蓋憤趙榮貪位者之若陟懸崖險不能止然後嘆不知稅駕之所焉可及矣

素車白馬

史記秦始皇三十六年秦人鄭容為始皇使從關東來至華陰望見素車白馬從山上下知其非人止道左而待之遂持璧與鄭容曰為我遺瀉池君今年祖龍死鄭容問其故忽不見置其璧去注云瀉池君水神也江神以璧遺瀉池之神告始皇之將終也秦以水德故其君將亡水神先自相告祖始也龍君象謂始皇也

朱鬚紫衣

六帖唐主車駕次華陰山見嶽神數里迎謁上召諸巫

問神安在獨老巫阿馬婆奏云在路左朱鬢紫衣迎候
陛下上顧笑之及上至廟見神索轎俯伏庭東南大栢
樹下上加禮敬尋詔先諸嶽封為金天王

受金丹

列僊傳馬明生從安期先生受金液神丹方乃入華陰
山合金液不樂升天但服半劑為地僊

鳴石鼓

華山記山有靈泉二所一名蒲池泉一名太上泉池北

有石鼓父老相傳嘗有聞其鳴者

通帝座

李白登華山落鴈峯曰此山最高呼吸之氣想通帝座矣恨不攜謝朓驚人詩來搔首問青天耳

通天門

杜甫望嶽詩車箱入谷無多路箭括通天有一門按華山雲臺上有石盆可容水數斛明瑩如玉俗呼為玉女洗頭盆也車箱谷箭括門皆西嶽名跡登嶽所由之徑

也

熒光休氣

李白雲臺歌送丹丘子曰西嶽崢嶸何壯哉黃河如絲
天際來黃河萬里觸山動盤渦輟轉秦地雷熒光休氣
紛五綵千年一清聖人在巨靈咆哮擘兩山洪波噴箭
射東海三峯却立如欲摧翠崖丹谷高掌開白帝金精
運元氣石作蓮花雲作臺

仙草瑤池

張說撰太華山碑銘踞中土西偏當七宮正位是稱西
嶽石壁磔堅而雄竦衆山奔走而傾附其氣肅其威振
其行配金其辰直酉前對華陽之國後壓華陽之郡左
抱桃林之塞右產藍田之玉諒少昊之下都即蓐收之
別館也下有方士真人金鼎石室上有明星玉女仙草
瑤池

王猛隱居

崔鴻前燕錄王猛隱居華山聞桓溫入關披褐詣之捫

風談當代之事傍若無人

陳搏修道

陳搏修道於華山雲臺觀中大因三十六載小因十八春

嵩高山

嵩高山五嶽之中嶽也在洛京王屋縣名上帝司真洞天唐天文志鶉火大火壽星豕韋為中州其神主於嵩丘鎮星位焉白虎通中嶽獨加高字者蓋山在

四方之中而高故曰嵩高

二室

戴延之西征記嵩山三十六峯東曰太室西曰少室相
去十七里嵩其總名也謂之室者下有石室也少室高
八百六十丈上方十里與太室相埒但小耳漢武帝嘗
於太室山中作登仙臺萬歲亭

三臺

雜道書嶽神廟東有三臺山昔漢武帝東巡過此見學

仙女即此

望都峯

嶽之西北一峯號望都峯天氣晴煖即望見洛陽隱隱如車蓋之狀六帖嶽之東北一峯號雞鳴峯五更初便見日出

擣帛石

五代秦再思記嵩山之上有玉女擣帛石瑩徹光潔人莫能測嶽下人云立秋前一日中夜常聞杵聲

生賢佐

詩大雅崧高維嶽峻極於天維嶽降神生甫及申維周之翰

封天王

唐書則天垂拱四年七月改嵩山為神嶽封其神為天中王至萬歲通天元年辛巳尊天中王為神嶽天聖皇帝天靈妃為天中皇后

神呼

漢武帝詔朕有事華山至於中嶽獲駮鹿見夏后啟母
石翌日親登嵩高御史乘屬車在廟旁吏卒咸聞呼萬
歲者三登禮罔不答其令祠官加贈太室祠禁無伐草
木以山下三百戶為置奉邑

童謠

五行志唐高宗調露中始欲封嵩山屬突厥叛而止後
又欲封以吐蕃入寇而止時童謠曰嵩山凡幾層不畏
登不得但恐不得登三度徵兵馬傍道打騰騰

許由山

雜道書東龍門之南有許由山高大四絕其北有潁水乃堯聘許由處猶有壇墀在焉

楚客舍

唐杜楚客因建成難作遁舍嵩山正觀四年召為給事中不應太宗曰居山似矣謂非宰相不起詎然耶

靈藪

盧元明記嵩山為棲神之靈藪長松翠栢生於嶺間左

右為古人住止處有銅銚器物

仙館

劉義慶世說嵩山北有大穴晉時有人誤墮穴中見二人圍棋局下有一杯對飲墮者告以饑渴棋者曰可飲此墮者飲之氣力十倍棋者曰汝欲停此否墮者曰不願停棋者曰從此西行有天井但投身入井自當出若餓取井中物食之墮者如言可半年乃出自蜀中歸洛下問張華華曰此仙館也所飲者玉漿也所食者龍穴

石髓也

盧鴻廬

唐開元中隱士盧鴻字浩然隱嵩山賜隱居服官為營
草堂到山中廣學廬聚徒五百人嶽頂有中天池九絕
境處鴻皆勒銘

李渤築室

唐李渤築室於少室山中自號少室山人唐順宗徵為
左拾遺辭疾不至

溫公題字

聞見錄司馬公居洛嘗同范景仁過韓城抵登封憩峻極下院登高頂入崇福宮會善寺由輾轅道至龍門遊廣愛奉先諸寺上華嚴閣千佛岩尋高公堂渡潛溪入廣化寺觀唐郭汾陽鐵像涉伊水至香山黃龕憩石樓臨八節灘過白公影堂凡所經遊多有詩公不喜肩輿山中亦乘馬遇路險策杖以行故嵩山題字曰登山有道徐行則不困措手於平穩之地則不跌其旨遠矣

退之題名

歐陽永叔跋嵩山題名曰韓退之題名二皆在洛陽其一在嵩山天封宮石柱上記龍潭遇雷事天聖中余與梅聖俞遊嵩山入天封宮徘徊柱下而去遂登山頂至武后封禪處有石記戒遊龍潭者毋笑語以瀆神龍龍怒則有雷因思退之記遇雷事意其有所戒也其一在福先寺塔上當時所見墨跡不知其後何人摸刻於石也

道士種花

漢世道士從外國將貝多子來於嵩高山西脚下種之
有四樹與衆木異一年三花花白色香美

鍊師絕穀

李白贈焦鍊師曰嵩山有神人焦鍊師者不知何許婦
人也又云生於齊梁時其年貌可稱五六十常胎息絕
穀居無室廬遊行若飛倏忽萬里世或傳其入東海登
蓬萊竟亦不能測其性也余訪道少室盡登三十六峯

聞風有寄灑翰遙贈云二室寄碧天三花明綠烟中有
蓬萊客宛疑麻姑僊道在喧莫染跡高想已遷時餐金
蛾並屢讀青苔篇八極恣遠憩九垓長周旋潛光隱嵩
山鍊魄棲霞幄霓裳何歲徙羽駕轉綿邈願同西王母
下顧東方朔紫書倘可傳銘骨誓相學

使者乘龍

漢武帝內傳武帝夜夢與李少君俱上嵩山半道有繡
衣使者乘龍持節從雲中下言太乙請少君覺乃告近

臣曰如朕夢少君將舍朕去矣

王子駕鶴

見七夕

授書

白龜年樂天子也一日於嵩山東巖下遇李白曰吾與汝父皆仙矣出素書一軸授之曰讀此可辨九天禽語九地獸言龜年一日過潞州二雀啾唧過州太守庭守曰彼何言龜年曰言城西人家有粟可共食之驗之果

然

枕襪

見月

衡山

衡山五嶽之南嶽也為荊州鎮在衡州府衡山縣名
朱陵太虛洞天寰宇記宿當翼軫度應璣衡故曰衡
山山海經衡山一名岫嶁唐天文志星紀鶉尾神主
衡山熒惑位焉盛弘之荊州記衡山南嶽也至於軒

轅乃以瀟霍二山為其副焉漢武南巡至盛唐山又以衡山遐遠阻江乃移嶽神於霍而祭焉亦承軒轅二山為副之義也

下踞離宮

六帖上承冥宿銓德鈞物下踞離宮攝位大卿

上有飛泉

荊州記衡山有三峯極秀獨一峯名芙蓉者最為竦傑非清霽之朝不可見峰上有飛泉如一幅練分映青林

直注山下

位列三公

六帖名備五嶽位列三公劉向說苑五嶽何以視三公
能大布雲雨馬能大飲雲雨馬觸石而出膚寸而合不
崇朝而雨天下施德博大故視三公

禮自百王

杜甫望嶽詩南嶽配朱鳥秩禮自百王歛吸領地靈
洞半炎方邦家用祀典在德非馨香巡狩何寂寥有虞

今則亡

紫蓋

寰宇記衡山盤繞八百里有七十二峯十洞十五巖三十八泉二十五溪九池九潭九井而峯之最大者五曰祝融曰紫蓋曰芙蓉曰石廩曰天柱惟祝融為最高

朱陵

南嶽文衡州南嶽者朱陵之靈臺太虛之寶洞赤帝館其嶺祝融宅其陽

九向九背

羅含湘中記衡山遙望如陣雲沿湘千里九向九背乃
不復見

一開一閉

臧榮緒晉書劉璘之好遊山澤採藥至衡山深入忘返
見一澗水水南有二石圀一開一閉水深不得過

聞絃歌聲

湘中記衡山九疑山皆有舜廟太守至官常遣戶曹致

敬修祀如有絃歌之聲

得金玉書

趙曄吳越春秋禹傷父功不成乃東巡登衡山血白馬
以祭之仰天而嘯忽然而卧夢赤繡文衣男子自稱蒼
水使者謂曰欲得我山神書請齋於黃帝之嶽禹乃退
齋三日登委宛山發石得金簡玉字之書言治水之要
因刻石於山之高處

迴鴈

埤雅鴻鴈南翔不過衡山衡山之旁有迴鴈峯蓋南地
極燠人罕識雪故鴈望衡山則止唐杜荀鶴詩猿到夜
寒啼嶽麓鴈知春信別衡陽

拂鳥

劉禹錫望衡嶽詩東南倚蓋卑維嶽資柱石前當祝融
居上拂朱鳥翮青冥結精氣磅礴宣地脉還聞膚寸陰
能致彌天澤

神禹碑

韓退之題岫嶠山詩岫嶠山尖神禹碑字青石赤形舉
奇科斗拳身薤葉披鸞飄鳳泊拏龍螭事嚴跡秘鬼莫
窺道人獨上偶見之我來咨嗟涕漣漣千搜萬索何處
有森森綠樹猿猱悲

祝融峰

朱元晦醉下祝融峰詩我來萬里駕長風絕壁層雲許
盪胸濁酒三杯豪氣發朗吟飛下祝融峰又青瑣祝融
峰詩一千里地盡皆見七十二峯中最髙

宗炳結宇

孫嚴宋書宗炳字少文好山水愛遠遊西陟荆巫南登衡岳因結宇衡山有懷尚平之志以疾還江陵嘆曰老疾俱至名山恐難徧觀惟當澄懷觀道卧以遊之凡所遊履皆圖於室謂人曰撫琴動操欲令衆山皆嚮

杜甫遊祠

杜甫大歷中出瞿唐下江陵泝沅湘以登衡山因客耒陽遊嶽祠為暴雨所阻旬日不得食

李泌願歸

唐李泌畏禍願歸衡山詔給三品祿賜隱士服為置室
廬以居之泌在衡山事明瓚禪師

韓愈默禱

韓愈謁南嶽廟詩五嶽祭秩皆三公四方環鎮嵩當中
火維地荒足妖怪天假神柄專其雄噴雲泄霧藏半腹
雖有絕頂誰能窮我來正逢秋雨節陰氣晦昧無清風
潛心默禱若有應豈非正直能感通須臾靜掃衆峰出

仰見突兀撐青空蘇東坡潮州韓文公廟碑能開衡山之雲而不能回憲宗之惑

常山

常山五嶽之北嶽也為并州鎮在定州常山縣名太乙總玄洞天爾雅常山謂之恒山五嶽圖恒山高三千九百丈七尺上方三十里周回三千里白虎通北方為常山者何陰終陽始其道常久故曰常山唐天文志大梁析木其神主於常山辰星位焉

畢昴之精

春秋元命苞畢星散為冀州分為趙國立為常山注常山是畢昴之精

趙代之境

常山居趙代之境管子曰其山北臨代南俯趙東接河漢之間

藏符

史記趙簡子告諸子曰吾藏寶符於常山上往得者立

為後諸子皆競往無所得母卹還奏曰常山臨代代可
取也簡子曰是知符矣乃廢太子伯魯而立母卹為後
得玉

崔鴻前燕錄慕容儁壽光二年常山寺大樹根下得璧
七十圭七十三光色精奇有異常玉以為神嶽之命以
太牢祠之

慕容得道

列仙傳慕容者常山道士自稱殷王女食蓬萊根往來

山下見者二百餘年顏色如二十許人

文成禮神

後魏書道武立廟於常山上置侍祀九十人歲時祈禱
水旱至文成帝東巡親禮其神焉

蛇曰率然

孫子兵法常山之蛇名曰率然一身而兩頭擊其一頭
則一頭至擊其中則兩頭俱至

草名神護

神農本草常山有草名神農置之門上每夜叱人

乾門坤軸

唐張嘉貞恒山碑銘包括綿長經綸中外外夷有四鼎
宿主胡則延袤以限之中郡有五寶符在代則高褰以
臨之其項也上秩乾門黑地之宮觀其足也下擦坤軸
玄神之都府

幽澗飛泉

唐太宗祭常山文絕壁千尋孤峰萬仞桂花浸月松蘿

挂雲幽澗冬暄飛泉夏冷竇符臨代邦之美靈蛇表陣
勢之奇鏢石七年無以虧其大含波九載不能損其高
巍巍乎與乾坤而永固隱隱乎橫古今而不絕

石

釋名山體曰石山多大石曰磐磐學也山多小石曰
礧礧堯也

土精

楊泉物理論土精為石石氣之核也氣之生石猶人筋

絡之生爪牙也

地骨

見地又石名雲根古詩黥黥布雲根森森散兩足蓋雲生於石故名

泗濱浮磬

夏書泗濱浮磬注云浮磬者石露水濱若浮於水也故名泗水名即今徐州

條支和丹

洞冥記漢元鼎中條支國貢異石以和九轉丹髮白者以石拭之應手而黑

興安櫛履

荊州記興安縣水邊有平石其上有石櫛石履各一俗云越王渡溪脫履墮櫛於此

饒州倉囤

鄱陽記錢倉石在饒州石形如倉囤昔漁人夜宿石上忽見石開窺其中有錢取之盈艇因名錢倉

猫睛

猫睛石出三佛齊國瑩潔明透如猫眼睛

龜背

贛州興國縣之儒林鄉有石圓如龜項背皆具人謂之
龜背石彷彿八卦形象逐月隨斗杓旋轉土人疑其怪
移置他所翌日復歸其處人因祀之

宋隕

左僖十六年春隕石於宋五

晉言

左昭八年石言於晉魏榆晉侯問於師曠曰石何故言對曰石不能言或馮焉不然民聽濫也臣又聞之作事不時怨譴動於民則有非言之物而言今宮室崇侈民力彫盡怨譴並作莫保其性石言不亦宜乎於是晉侯方築虎祁之宮叔向曰子野之言君子哉

石走

五行志資州有石方丈走行數步

石移

宋史福清石竹山有大石自移石方九尺所過成蹊

叱羊

見山

射虎

韓詩外傳楚熊渠子夜行見寢石以為伏虎彎弓而射之沒金飲羽下視之乃石也因復射之矢躍無迹與李廣事同

燕銜

西京雜記竇太后在家嘗有白燕銜石大如指墮后績
籠中后取石剖為二中有文曰毋天下后乃合之遂不
復開後為皇后常並置璽積中號曰天璽

魚化

水經注范文本日南西捲縣奴也為奴時牧於澗中得
兩鯉魚欲私食之即知詰文文詐云將礪石還非魚也
即至魚所果見兩石文異之石有鐵文因入山中就石

治鐵作兩刀舉刀向石郭呪曰鯉魚變化治石成刀斫石郭破者是有靈神文當治此因斫石郭如龍淵干將之斬蘆芻遂君其地

昆吾作劍

十洲記流州在西海中上有昆吾石治之成鐵作劍光明洞照如水精狀割玉如泥土

臨賀磨刀

荊州記臨賀有青石上有磨刀斧之迹春夏明淨秋冬

蕪穢云是雷公磨刀石

望夫

神異記武昌山北有望夫石狀若人俗傳昔有貞婦其夫從役遠赴國難攜弱子餞送此山立望夫而死化為立石因名焉

化女

幽明錄陽羨縣小吏吳龔嘗於溪邊見五色浮石因取納牀頭至夜化成女子

乞子

郡國志馬湖南岸東西有二石東石腹中出一小石西石腹中懷一小石故焚人乞子於此有驗因號乞子石

憇仙

酉陽雜俎荊州利水間有二石若闕名曰韶石晉永和中有飛仙衣冠如雪各憇一石旬日而去

玉女擣帛

見嵩高山

玉女掩扉

晏殊類要保寧府蟠龍山南有一石長四十丈高五尺
中有戶及門扉若人掩扉然號曰玉女房

子荆礪齒

晉書孫楚字子荆與王武子善少時謂武子曰當枕石
漱流誤云漱石枕流武子曰流非可枕石非可漱楚曰
枕流欲洗其耳漱石欲礪其齒

媯皓叩頭

東漢吳郡媯皓父為南郡坐事繫獄皓懷小石至公卿門輒出石叩頭流血覆面父遂得免

文若馬牛

魏畧梁州柳谷有石無故自崩有文如馬牛之狀乃司馬氏得天下之應也

象如龍鳳

零陵志石屏出零陵白鶴山屈處靜上昇之所紹興間有宗子一日艤舟山下於水中得一石光彩絢異紋若

峯巒聳秀渾然天成自是石工鑿取益衆其烟雲雪月之景波瀾龍鳳之象隱然可觀雖巧畫者莫臻其妙

淵明醉眠

廬山記陶淵明所居栗里有大石淵明嘗醉眠其上名曰醉石

德裕醉踞

唐余錄李德裕於平泉別墅採天下珍木怪石為園池之觀有醒酒石德裕尤所寶惜醉即踞之唐莊宗朝張

全義為太師兼四鎮節度有監軍嘗得平泉醒酒石德裕孫延古託全義復求之監軍憤曰自黃巢亂後洛陽園宅無復能守豈獨平泉一石哉全義嘗在賊巢中以為譏已大怒答殺之

雞鳴

夷堅續志分寧陳甫山莊有槌藁石陳夜步月忽聞雞鳴於石上即而視之不見移石於數步外至次宿鳴如故復攜石以歸置之月下雞必鳴其子剖視之中有雌

雄二雞文采可觀

鵲噪

夷堅續志宋宮有靈鵲石石中有鵲每天將明聞其噪聲宋南渡得之晉州

神鉦

述異記洞庭山石樓下有兩石叩之聲響如鉦人呼曰神鉦

僊鏡

六帖月林國西南有怪石方數百里光明澄徹可鑒人五臟六腑謂之仙人鏡其國人有疾照之其形遂知

有女浣衣

郡國志梁州有女郎山張魯女浣衣於石上女便懷孕生二龍及女死將殯柩車忽騰躍升此山遂葬焉

如人攘袂

幽明錄宜都建平二郡之界有五六峯參差互出上有奇石如二人像攘袂相對俗謂二郡督郵爭界

昆明刻鯨

西京雜記漢武帝昆明池養魚往往飛去後刻石為鯨魚置水中魚乃不飛每雷兩鯨嘗鳴吼

廬山飛鴈

潯陽記廬山頂上有池中有三石鴈霜降則飛

狗吠

郡國志宋武北伐南燕至吠狗山夜聞狗吠明日視之見石狗焉

犀沉

蜀郡有水災太守李冰乃刻石犀沉之江以厭洪水

踞之草制

唐書薛元超道衡孫也為中書舍人中書省有一大盤石初道衡為內史侍郎嘗踞而草制超每見石輒泣然流涕

愛而為銘

白居易集洛陽履道里弘農楊正一遺樂天以盤石方

丈平滑可以坐卧樂天愛而為之銘

驅海

見日

拋空

獨異記唐中宗為天后廢為廬陵王仰天而嘆因拋一石於空心祝之曰我復帝此石不落其石遂為樹枝勾挂

呼曰石大

石林燕語米芾字元章性好竒知無為軍初入州廨見立石頗竒喜曰此足以當吾拜遂命取袍笏拜之每呼曰石丈遂為言官所彈

號為石賢

封氏見聞記有古墓前石人以肉祭之能愈疾因號為石賢士又蜀中記隗叔通楚人也性至孝母每食必須江水水深難汲一旦水中石為之出叔通因之以汲今江中有石號孝子石

挂帶

揮麈錄政和間靈壁縣貢一巨石高二十餘尺周圍稱是舟載至京師毀水門樓以入千夫舁之不動或啟於上云此神物也宜表異之裕陵親灑宸翰仍以金帶一條挂其上遂即可移省夫力一半頃刻至苑中

作樽

唐元結集道州東左湖有小石山山巔有窰石可以作樽名窰樽石又作亭於樽上

仲庶救護

楊公筆錄金陵有三大石甚古吳仲庶作守日夜夢三
舉子求哀且曰若不垂佑當為煨燼矣公甚異之詰日
徧問莫能原其意既而視牒見兵馬司狀申乞燒三石
為灰供修造之用遂悟敕寺僧愛護元祐中毛漸作漕
欲移置解舍掘之極深而石根不斷乃罷

虞愿往觀

齊書虞愿為晉平太守海邊有越王石嘗隱蔽雲霧相

傳清廉太守乃得見慮往觀則清徹無隱蔽

豫章熟炊

異志豫章有石黃白色而理疎以水灌之便熱安甬其上炊足以熟冷則復灌之雷煥以問張華華曰燃石也汶上得鹽

華陽國志汶上有鹽石煎之得鹽

五如

五如石在道州城東唐元結序濤泉之陽得怪石焉左

右前後乃登石巔皆相似故名曰五如石并建五如亭於此

三品

上元縣東北同泰寺即梁武帝捨身處寺前有醜石四各高丈餘陳封石為三品俗呼為三品石王安石詩草沒苔侵棄道周誤恩三品竟何酬國亡今日頑無耻似謂當年不與謀

似芙蓉

名山志芙蓉渚有聳石如初生芙蓉色青白

名霹靂

玄中記玉門西南有一國國中有山石磻數千枚名為霹靂磻從春雷而磻減至秋磻盡

雞冠

長沙縣北江濱石其形高聳似雞冠

馬蹄

湘潭縣錦灣之側有石如馬蹄又漢元鼎間鄧支國貢

馬肝石百升以之拭髮白者皆黑帝坐羣臣於甘泉殿
有髮白者以此石拭之應手皆黑是時公卿語曰不願
作方伯惟願拭肝石

董威寢所

晉陽秋董威遁去不知所之於其寢所得一石及詩二
首

趙岐墓前

東漢趙岐曰吾死後置一圓石於墓前刻曰漢有逸人

姓趙名岐有志無時命也如何

大秦九色

魏畧大秦國以石為城郭出九色玉石

桐廬一指

桐廬縣有石長一丈高五尺綴巖谷間以一指抵之則
搖動人力多則不能動故以一指名之

僧孺蓄奇

唐牛僧孺字思黯封奇章公治第洛之歸仁里好蓄奇

石以甲乙丙丁爲品每品有上中下三等各刻於石陰

正臣蓄異

東坡詩集湖口人李正臣蓄異石九峯玲瓏宛轉天成儼若牕櫺名之曰壺中九峯

覆書

吳越春秋禹按黃帝中經見聖人所記在九疑山東南號曰委宛承以文玉覆以磐石禹齋三日發石取之得金簡玉字之書然後知百川之理


成字

唐貞觀十七年八月梁州昌松縣鴻池谷有石青質白
文成字八十八太宗遣使祭之曰天有成命表瑞貞石
文字昭然歷數惟永又二十年陝西有石成字曰李君
王開元十九年河南登封縣石文舊有帝字新生上字
山水草木之形

大理府點蒼山出石白質黑文有山水草木之形溫潤
如玉可琢為屏

人物溪橋之狀

階州北峽中有石青質黑理其文有松栢人物溪橋水
石山林樓閣日月之狀



山堂肆考卷十九